

晚

晴

移

詩

匯

晚晴謬詩匯卷一百四十三目錄

段承實 四首

王紹燕 三首

廷桂 三首

鮑康 三首

楊炳春 八首

甘丙昌 二首

戴粟珍 十二首

陸徽恩 六首

王景賢 二首

葉霖藩 一首

王樸 一首

董恂 二首

黃倬 一首

殷兆鏞 二首

廉兆綸 一首

蔣琦齡 九首

黃兆麟 四首

胡焯 二首

馮桂芬 四首

蔡壽祺 四首

周蓮仲 一首

莊受祺 二首

姚近韓 二首

艾暢 七首

吳世涵 二首

潘會綬 五首

施燕辰 二首

史夢蘭 七首

汪士鐸 十二首

劉日萼 四首

毛貴銘 四首

曹翰田 二首

薩大文 一首

張燁 一首

郭柏蒼 二首

晚晴縹詩匯卷一百四十三

徐世昌

段承實字芳山南昌人道光己亥舉人由內閣中書歷

官刑部員外郎有寸草心齋詩鈔

神香圃曰芳山性情伉爽無雕飾其詩文生平
情意餘於筆不規規於絺章繪句而自然華妙

夜行

水響暗中聽孤帆夜不停舟輕去飛鳥銜閃似流螢風靜
浪仍白月明山更青五更有涼意秋色在疎星

雜詩

黃鶴舉青霄千里勢遼闊秋蚓食槁壤寒泉自斟酌一朝
失其所兩者無可託魚豈羨鳶飛鳶不知魚樂得意各有
在所苦網與繳英雄豈無用失時轉寂寞猛虎去深山不

如林間鵲

鸞鳳不世出誰復知羽儀良馬來冀北難與伯樂期駑駘
思逞能燕雀爭高飛豈能應昌運終爲世所嗤驥稱不貴
力鳳至惟其時吾衰亦久矣嗟歎爾何爲

懷方晚樵

錫庚

茂才

落拓頻年慣頭巾獨可憐貧深轉多病境累欲逃禪於我
最知己與君同信天燕雲望江樹遙隔路三千

王紹燕字穀貽仙游人道光己亥舉人歷官衢州知府
有不忘初齋詩草

自城南傅家村歸

晚自城南十里歸釀霜天氣冷侵衣三間茅屋炊煙起一
帶寒林落葉稀世事盡從流水去客心翻逐暮雲飛不貪

秉燭游清夜尙有流光月照扉

延平舟次聽榜人歌陳將軍遺事慨然爲賦

劍州山水天下奇生長閩南愁未知春風北鴻不得意暑
雨歸來溪漲時青山蹀躞向東去孤城高扼烏飛處千仞
峯巒雙塔存怪石巉巖鑿煙樹浪花倒搖山影奔灘前舟
子如雲屯撐篙注眼默相視側照落日翻金盆兩岸啾啾
鳥嘯絕百世茫茫幾人傑回憶當年陳將軍不歸中原歸
窟穴荒陵白骨成古邱陰風吹月聲颼颼淮右羣雄問何
在開平勲業沈泡漚元明往事莫長歎一方自霸震鄉閭
至今父老矜傳聞坐看江流日汗漫

客有談洞庭之勝者賦此奉簡

我生井蛙拘一經抵掌喜聽譚洞庭蒼梧帝子不可遇何

年看徧君山青岳陽樓上溯張李妙句驚人一篇耳沈吟
更讀離騷經千古流傳儻如此我聞斑竹猶昔時湖光皺
綠澄玻璃八百里中淼浸月月影倒空樓閣奇長隄偃虹
天低處大江東過武昌去曹公洲前常朗吟銅鼓雷文爲
誰鑄木葉飄下秋波心船檣鴉尾銜煙岑魚龍夜靜布帆
落鴻雁霜寒湘水深人生百年祇過客越浦吳山盡陳迹
借問荆關堪卧游生綃許拂三百尺九疑峯峻那須論雲
夢迷離當氣吞眼中歷歷誰落筆更吹鐵笛開芳樽

廷桂字芳宇滿洲旗人道光己亥舉人歷官永州知府
有仿玉局黃樓詩藁

次方桐翁世丈留別韻

蒲輪安穩不須停心醉諸生有六經湖上曾懸高士榻天

邊再見丈人星鄉愁水曲鷗波遠老怯宵寒鶴夢醒歸向
君山蓄春茗一瓢徑欲遞中冷

端午日以銅鼓新荷饋子纘學使並綴二絕

伏波南下五溪深破痕樓船達桂林烽火連營鑄銅鼓雨
中滴出漢時音

蕭蕭菡萏豔端陽淨植亭亭壓眾芳別有柳州九孔藕城
陰才賸半陂塘

鮑康字子年晚號臆園歙縣人道光己亥舉人歷官夔
州知府有觀古閣詩鈔

詩話臆園酷嗜古泉所著續古泉匯泉說及觀古閣
題跋鑒別精而考訂審藏泉家奉為導師集中懷人
詩六首劉燕庭陳式甫呂堯仙何
鏡梅陳壽卿劉振齋皆同好也

淮陰釣臺

欲搜遺址但蒿萊屠釣中多大將才千載興亡君莫恨歌
風戲馬盡荒臺

古泉三十六韻

雅癖推金石鯁生更癖泉搜羅償夙願辛苦憶兒年和嶠
情同錮洪遵志續編標新臚大小繪影肖方圍制向錙銖
析文徵面背全殊形刀詰屈異樣布精堅厭勝閒情肆題
祥吉語聯旁稽瘋海外詳紀夏殷前芬訝黏襟古暉驚燭
几鮮青紅苔繡溼斑駁土花妍偶值奇相餉真令喜欲顛
五金紛冶鑄廿載耐磨研貪許鉤心鬪趨嗔捷足先窮檐
晨訪踏列肆夕慌連癡尙誇奇觀貧偏結古緣但教珍翠
擯那惜賣珠鈿紈扇光如拭藤牀夢也牽選叨劉寵贈佩
比阮修懸舊譜癡頻索新詩句好傳妒嗤慳出手羨笑久

垂涎贗鼎思爭售魚珠愧未捐軼材搜寶鈔餘事侑瓊筵
雨過吟秋館涼招薄暮天半生忙似賈此日快疑仙筠箔
澄於水紗窗白勝藤甌香斟苦茗鑪翠篆疏煙羅列繡囊
富縱橫錦篋駢螺丸磨處膩蜺楮拓來便綺席人高踞璇
閨侶乍延登登聲著紙悄悄影移瓢古篆盤蝸結名書舞
鶴翩神爭碑版秀字證鼎彝鐫墨本裝緗帙郵筒遞綵箋
剖疑滋辨論數典費言詮探袖逾三百論緡貯十千書迂
還著錄兀兀事丹鉛

明妃

不向深宮拭淚痕妍媸肯對畫工論笑他買賦長門女卻
擲黃金結主恩

楊炳春字嫩芸吳江人道光己亥舉人浙江候補知縣

殉難有扶雅堂詩集

詩話漱芸詩數昌黎安貼排纂時時作硬語士苟有志固不當隨風氣爲轉移也

喜晴和雲門韻

黃人失守金鴉逃白龍倒翻滄海濤如輪黑雲橫天半兩
月不見高天高綠章誰人達天耳只恐將天都化水天忽
大怒雷夜鳴霹靂一聲雨爲止黑雲破碎紅雲生扶桑曉
日排雲行繞日虹光一萬丈豈有神怪敢相爭乃知天欲
蘇民困約束祇憑威一震他時客向海上來定見乖龍縮
成寸

讀借公完玉堂詩藁

能不作僧語自然得好詩才華本天授刊落亦何爲獨愛
借公集雅多儒者詞心清氣雄傑世外想英姿

春暮作歌用昌黎寒食日出游韻

久晴則陰吾何病轉惜歲首春光盛若教移向三月來照
眼定多紅紫映含葩紛紛欲出奇其力那與造物競易落
只坐天黯慘催開空費人吟詠盈庭老綠圍幄張何處生
紅妝東正幸哉年年例三月韶光過去還能更勸爾弱植
勤栽培慎勿相向嗟薄命皇天平分此四時苑枯萬物潛
操柄豈無他時增蕭索先與眼前集喜慶盛極不再真堪
哀晦久而發乃可敬矧茲陽春本有腳捷回腸谷途非負
回紅轉綠只咫尺處高聽卑仗明聖羣花與樹暫別離明
年此日終合併但恐中槁滋朽蠹召彼戕伐傷本性草根
木質果堅貞兩師風伯空驕橫我持此論向中夜疎星漸
看雲隙迸須臾薄霧盡捲卻清光宛若新揩鏡會逢其適

陰變晴誰操厥券詩為政喚回春首力不能預計來春語
則勁餞春翻出迎春歌興來忘卻炎官令

渡江作

舟中不知波濤大耳中但覺風聲快推篷起叱咄咄怪我
頭欲昂船欲拜一波軒軒九州隘一壺不見千金賣蛟龍
作勢舞淫淫饑口呀呀幸人敗平時風順一帆挂船尾舟
人跛腳話張帆今入長江界眾目睽睽口喋齟而我無端
發深喟世途無處無機械安得長如此時戒

漢延平熨斗歌為認菴作

斗缺一角柄上有隸款兩行一云延平元年造一云

八百廿六左

延平始終無一年當時鄧后專威權銅斗有柄載年號觀
此款識加愛憐斗體純作瓜皮綠古色爛斑眩雙目已撞

玉斗當雁行欲補金甌反蛇足吁嗟此斗雖缺非尋常元
年二字書煌煌殤帝賴爾壽命長斷碑折劍何足擬好配
漢家傳國璽

讀梅宛陵詩和本集永叔進道堂夜話詩韻

涼雲抱雨頽候蟲嘯秋急一鑑閃虛牖窳窳精魂入斂心
與酬對擬追微渺及視膚略無奇覩髓行難十羊腸鬱百
盤盤盤平野立何嘗空虛爲端由豪橫戢鎔韓英斯存煦
孟寒不襲當其夏夏難有似硜硜執豁然得懸解活古一
呼吸於公本自然傳後憎僻澁不博淺學歡要取眞宰泣
嗟予素疎陋奧旨未全挹誓終索淵珠苦意鞭潛蟄

編錄先仲兄遺藁追悼

涕淚深深欲滿衫竟從苦海斷歸帆夜臺得友心應慰石

關知君口尙銜鴻雁餘哀雲外叫風波無恙篋中緘遺編
重向殘燈讀此筆生前早蛻凡

題燉煌太守裴岑紀功碑拓本

提兵三千人立功萬里外裴公信桓桓與漢除災窖嗟哉
竊祿徒養尊幸時泰履常恣欺謾蹈險喪狡獪國讎倉卒
逢未戰先狼狽微軀不如草苟活向敵匈奴人不畏死所
以功名大古人儻畏死姓氏久塵壙我讀裴公碑英風想
旌旆裴公不復生呼酒爲公酌

甘丙昌字棠牧鄰水人道光己亥舉人官太平教諭有
生香閣詩草

杜牧之墓

傷春傷別鬢如絲不比南朝舊總持十里青樓盼書記兩

行紅粉笑分司談兵澤潞工何益出守湖壩事竟遲手把
玉簫來醉酒無能有味感情時

蘇門

蘇門山上有閒雲長嘯而今更不聞琴客酒徒淪落盡風
流嵇阮媿夫君

戴栗珍字禾莊貴筑籍清鎮人道光己亥舉人有對牀

聽雨詩屋詩鈔南歸草

詩話禾莊與史荻洲齊名道光中大安二郡稱詩者
推史戴皆嘗學詩於吳蘭雪荻洲客死奉天禾莊為
歸其喪歲必為其母致書遺金給以荻洲遠游母至
死尚以為其子生存也荻洲歿年三十五禾莊歿亦
止四十莫郡
亭有二哀詩

雜興

好山當我門空翠落硯几層軒敞虛幕日坐嵐光裏巖壑

變陰晴雲藍間青紫紅樹障峯腰斷霞結疏綺何處憩冥
情卽此詣畫理我心素已閒近復淡於洗終日了無言澄
澄對止水

夜靜魚鑰沈窗際上寒月對此不能寐攬衣興超發散步
出疎簾清光皎於雪尖風吹我衣冷然濯毛髮冥契得詩
意際此殊精絕湛湛澈寒泉冥冥墮松屑鼻觀遠聞香小
定味禪悅

界首

羣峭摩青蒼橫空排大翻水阻山怒爭怒積不可洩拔地
峙一峯太空獨橫絕天骨琢蒼秀雲根聳孤特造化始何
年積此萬古鐵堅綻土花青瘦縐古苔黑獨力障長江狂
瀾欲倒曳豪氣爲之揚浩歌震林樾

霜夜卽景

瓦背霜落寒生棱殘月弄影清於冰空階但覺露華滴老
竹撲折纏枯藤霜氣化煙煙入月月霧含霜皎於雪漫空
亂滾兜羅綿樓臺倒入天際白大千都入混茫中一氣鼓
出雲蓬蓬我想乾坤未造始元黃混沌將無同斯時定有
方瞳翁虛無遊戲騎白龍星冠羽帔不可見似聞仙樂聲
搖空忽然霜颿疾如箭淨掃長天開匹練樓觀城郭出空
中滿地霜華飛片片兀立我已寒不溫一縷涼澈玻璃魂
閉戶方欲覓詩夢老鶴一聲來叩門

初入定番

瘴雨連天迴巒雲貼地浮山分金竹秀城控木瓜秋笳鼓
喧軍壘蘆笙繞市樓時情久無事來伴仲宣游

浦市

風波歷不盡曉發雨濛濛蓬帶辰谿雪帆收浦市風圓沙
圍岸闊平楚接天空彷彿鄉關路雲生白塔中

秋夜偶檢蘭雪師自書遺藁感賦

先生久已騎鯨去零落當年字尚存殘蠹半留仙後蛻泥
鴻細認雪中痕武夷九曲雲封碣柘水干潭浪打村憔悴
鶴奴詩弟子寒宵重與賦招魂

順德道中雜感

東西分跨太行孤莽莽河山得氣麤三輔近蟠龍虎地九
邊遙護帝王都雁門自昔饒名將燕市如今少狗屠扼險
更兼民氣勁登車一為覽皇圖

河聲嶽色入雲高百雉城多抱闊壕蕃將至今思代馬健

兒從古愛并刀
葡萄綠醉肝腸熱
苜蓿青肥駱駝號
遙指薊門風動處
紅燄猶射舊旌旄

雕盤大漠雁橫天
割據王侯舊有年
石勒歸來先霸趙
慕容老去尙圖燕
丈夫膽直羞狐媚
回部營開枕駱眠
六代茫茫零落盡
惟餘鴉點盪寒煙

玉屏舟中

疎林寥落淡黃餘
近水人家取次居
燒得船頭蘆火活
紅薑白水煮寒魚

滹沱

藥城昨夜共悲歌
擊碎春鐙感慨多
破曉行來殘醉在
蕭蕭寒日渡滹沱

陸黻恩字紫峰號亞章陽湖人道光己亥舉人有讀秋

水齋詩

香草河

推蓬草煙霽繫纜夜潮生好月隔江出孤峰帶雨晴野塘
鷗鳥靜遠水荻花明來日金陵道青山數點橫

得以黃兄書知歸有日矣喜而賦此

七載分飛影勞勞溯客程稻梁前日事鴻雁此時情流水
渡頭急殘星樹外明休辭一尊酒翦燭到三更

懷董二思誠

秋雨秋風夜江南江北天故人千里外清夢十年前壯志
應難減浮名終自牽儒冠休道誤願著祖生鞭

拜宣公祠

艱難行在扈鑿輿慚愧梁洋灑涕初河北猶傳哀痛詔忠

州已睹驗方書頡頏房杜元無忝沾漑歐蘇尙有餘卅葉
耳孫瞻廟貌聊同村叟薦溪蔬

漫興

少日原期竹帛勳豈知半百尙無聞將衰親舊多新鬼熟
練人情看暮雲潦倒更休投貴刺飄零懶作送窮文何時
辭得輪蹄了送老壘鹽一盞醺

山行

山行犖确瘁輪蹄谷轉溪回望欲迷一徑落花孤館外幾
家斜日亂峰西身如病驥嗟遲鈍心羨歸鴉得穩棲暫假
華胥差亦樂村醪雖薄藉扶攜

王景賢字希齋閩縣人道光己亥舉人咸豐辛亥舉孝
廉方正有伊園詩鈔

晚泊烏石灘與碩甫對榻拈韻

一水涵空碧青山忽滿前
亂蟬催落日獨鳥沒秋煙
帆影隨流曲灘聲抱岸圓
釣魚人不見終夜客星懸

送林少穆先生戍伊犁

時事竟如此空教淚滿襟
敢云臣罪薄終感主恩深
史策丹心在光陰白髮侵
玉關何處問西望暮雲沈

葉霖藩字魯泉休甯人道光己亥副貢官繁昌訓導有
瑯峰草堂詩鈔

夜泊京口

北斗插漢橫天東江光一色涵
澄空老魚吸月踏波起水
銀萬頃搖蛟宮一龕佛火金山碧
煙樹南徐看歷歷烏蓬
露冷不成眠鐵甕城頭吹玉笛

王樸字守愚臨榆人道光己亥副貢有知足齋詩草

秋夜卽事

若非經夏閏今夕是中元蟲語棲花徑螢光暗草根漏沈
知夜盡月上覺燈昏翻羨鄰家好通宵靜掩門

董恂初名醇字醞卿江蘇甘泉人道光庚子進士官至
戶部尙書有菽芬書屋詩藁

舟中曉起

曉氣清連夜氣清扁舟人在畫中行菰菱佐饌饒鄉味蒲
葦搖空作雨聲帆影乍驚雙鷺起林陰時聽一蟬鳴俗塵
三斗銷除盡誰道勞勞累此生

靜女篇

幽蘭在空谷清露晞朝陽靜女貞且勤淒風動流黃孤芳

時自賞悠悠思難忘大姊游以嬉相攸託金張二姊性矜
貴珠翠溢晶光小妹嬌可憐長依阿母旁語妙粲花舌啟
口生芬芳靜女獨椎髻掩抑棲空房河邊暮碁杵廚下朝
芥薑不惜終歲勞但願高年康高年壽且康妾心樂未央
黃倬字恕階善化人道光庚子進士改庶吉士授編修
官至吏部侍郎有介園遺集

嚴先生釣臺

水勢滌洞分外青舟行嚴瀨認孤亭故人若使儕臺諫御
榻誰知有客星尙愛漁歌隨荇浦欲從石室薦椒馨危灘
七里清泉酌前路梅花指畫屏

殷兆鏞字序伯號譜經吳江人道光庚子進士改庶吉
士授編修官至禮部侍郎有齋莊中正堂集

詩話譜經奮起孤露壹意幼學入詞館直上齋承明
著作之庭迴翔凡數十年軺車所至珊瑚鐵網得士
爲多詩雍容大雅猶
是承平臺閣體裁

讀文選

坡公直是譏無用杜老頻聞勸熟精省識宋唐分界處文
章風尚與時更

建甯

星程訪古南鄉路風物嘗新北苑茶樓燉碧雲懷郡治嶺
環紅樹有人家詩心夢攬天湖景藥籠思收澤瀉花使院
酒闌還點筆尊聞堂外月初斜

廉兆綸原名師敏字葆醇號琴舫甯河人道光庚子進
士官至倉場侍郎有深柳堂集

天津喜陳仲鸞同年相過

種樹風煙長移花歲月深稍添春爛漫渾忘老侵尋閱世
成流水何時返故林便開松菊徑共葆雪霜心

蔣琦齡字申甫全州人道光庚子進士歷官順天府尹
有空青水碧齋詩集

陽朔看山

嶺外多好山陽朔最奇詭淨洗看山晴一棹下灘水應接
初不暇邂逅無窮美生平所未見見之心爲死奇者已非
山層出猶未已日暮維我舟翹首更一視行空走羣獸攫
人伺竒鬼竟夕頸爲縮屏息篷窗裏詰朝掛帆去高情稍
倦矣我聞養生射全名在一矢用兵得重瞳百勝不足恃
贅若舍人蛇賤如遼東豕行文貴有餘懷才宜知止嗟哉
陽朔山所傷惟多耳

山山皆如畫猶恐畫未能何獨一小山偏以畫見名苔草
炫金碧懸厓展幃屏石紋潑水墨一幅渾天成當其有山
時世未有丹青胡爲造化兒預搆狡獪情畫師摹真山山
乃以畫稱轉輾但相似何者爲山形是周亦是蝶此理難
具明問山山不語盡日山中行

送朱伯韓

琦

侍御還鄉

柏府霜寒烏夜飛朝簪曉脫理征衣泰山東望雲猶蔽秋
色西來燕已歸出處無慙從古少文章有用似公稀郭門
供張何須設恐被旁觀說見機

寒花背指放船時驛路深秋景最宜新得詩篇聊自賞舊
焚諫草有誰知洞庭日落帆千里易水風寒酒一卮我是
徂徠狂直講終逢聖德更題詩

宿武連驛次和放翁武連縣詩寄霞舫少鶴

四十功名未可期，秋懷應有故人知。
三刀遠道銷髀肉，九月清霜點鬢絲。
世路艱危忘棧險，宦情恬淡到官遲。
回看禁掖朋從隔，古縣鳴笳向夜時。

寄王子壽

梅花晚飛翻歸楫，江汜風塵黯損神。
亂離迫暮齒延頸，戀朋知合沓歲月駛。
詞壇久闊疎悠悠，殆二紀螺州雪後晴。
延緣獨葭葦，蹙然聞足音。肩輿衝泥滓，樽酒展素心。
時事從掌指，漆室傷懷抱。涕淚痕滿紙，干戈老萊衣。
洗然賤朱紫，忠愛本性成。爵祿心則死，天聰闢四門。
國運隆任姒，諸公頗用心。駿骨諒已市，斯人國之楨。
文章固小技，芝蘭不言芳。詎合敗荆杞，未登白玉盤。
永爲老圃恥，崎嶇全軀。

命吾衰亦久矣早年識璠璣孤芳陋桃李新文更起予罪
言彌奇偉論都策滇事所見無彼此豈惟臭味同出處固
相似瀟湘連洞庭極目春千里美人天一方濯足娟娟水
寂寥身後名一笑但相視

輓朱伯韓

宣廟有三直吾推朱子公立朝凡幾日疾惡乃如風炙手
兀時宰焦頭論近功當年笑迂闊頗與紫陽同
未洩種胥憤堪悲晁賈才旁求朝命下痛惜士林哀奏議
塵封久靈旗血戰開中丞速攻取白馬擁潮來
絕學成孤詣高文得正傳規模誠闊遠襟抱亦冲淵岳笑
輕塵足材勞朽木鐫劉蕢風義重疊入玉溪篇

黃兆麟字叔文號黻卿善化人道光庚子進士改庶吉

士授編修歷官光祿寺少卿有古檣山房遺藁

舟中雜詩

牛羊下夕陽薄暝散層麓一叟荷樵歸暵煙入茅屋漁舟
爭渡喧夜氣沈溪曲孤雲扶月來窺我隔修竹篷窗篩碎
影斜映一篇讀萬籟寂無聲江水澹涼綠寥寥元化間生
意幽然足

頽雲壓崇嶺飛雨灑空江灘聲作雷吼濤奔如急瀧沈陰
裹孤艇四顧但蒼蒼敲枕坐深黑祇聞人語哢衝風摧危
壁碎石墮琤琮舟子前後呼篙楫相擊撞天威遞收攝急
點停淙淙開門望山岸涼月挂魚缸

諸葛武侯銅蒺藜歌

罡風捲空雲四垂扁舟駕浪帆不鼓蓬窗開箭光陸離云

看武侯銅茨藜芒耀四射形模奇苔斑變作鱗之而古如
寶采騰鼎彝峭如圭角森岐嶷銳如穎脫囊中錐晃如霜
鏘生戟枝是真神物何岷崎當年武功屯虎貔風雲入陣
開魚麗連濠密布如棘茨賊騎卻顧奔且馳定軍山畔愁
雲迷五丈原頭星隕輝金刀祚盡哲人萎此物光芒長不
隳鄴宮銅雀久塵泥此物雷霆爲護持木牛流馬千秋遺
奇籌轉餉咸仰追豈知當日雄軍威杈杼滿營助險巖卽
今入手含霜暉英風颯颯砭人肌眼中如見千熊羆戈矛
森列揚靈旗昔讀我鄉陶園詩漢中通守曾得之毛君何
緣憩神祠沙場寸鐵行囊攜丹中濡筆不敢題滿江白浪
騰蛟螭

吳三桂繫馬椿

溷王遺蹟淶江涯業嶽危樁繞古霞此處山中曾繫馬當年井底欲鳴蛙寒煙十里聞嘒鳩灌木千尋噪晚鴉魚足昔時成竊據至今甲冑在長沙

胡焯子光伯武陵人道光辛丑進士改庶吉士授編修
歷官侍讀有楚頌齋詩集

苗先麓所藏河間獻王君子館專歌

日華宮阨霜蓬焦毛公祠存客游敖
檝驅土光燭霄斷
甃雙紐雷文交金甃倒落虹蜷要漢皇求仙東射蛟
小山
鴻寶紛招邀簫管吹臺何寂寥
申詩不傳王戊驕河間好
儒築館勞山東諸生來俊髦
六籍不弛西秦燎書敞周官
樂歛韶嘉賓笙簧車乘翹素絲五馬干旌旄
君子何在貫
與毛三十年後今聯鑣
離生稷乳經談苗遺專入甌
纁重

包銀繭拓分圓麝膏未央漢宮銅爵曹搜剔遺瓦披榛茅
晉隸豈識元康朝五鳳八分驚遁逃延陵舊碑申浦遙孔
篆疑似唐刻滑大雅不溲精靈超此專何啻干瓊瑤儕魯
大璜周赤刀隄經鴻都雅肄宵椎氈摩煙麟閣標緹襲緘
滕囊橐囊載車萬輪舟百梭胡爲井甃占易爻蝸篆古壁
塵栖寮西陟虞阪躋中條抱玉南涉吳江湖扣缶自作幽
并謠運甕誰惜荊州陶交河北流寫平泉客館二十淪荒
郊獻王陵樹秋風號

張石舟與何子貞旣構顧先生祠刻亭林年譜成因
得觀蔡小石司業家藏萬年少秋江別思圖圖作
以贈亭林者也石舟與子貞各摹其畫及識語并
程氏易疇題跋裝爲卷石舟手書亭林贈萬舉人

詩又所作次顧韻題此圖詩補成顧祠秋祭詩并錄於卷屬賦詩得五言一首

先生聖人徒間世乃一逢古音儼伶倫調以嶰谷箛四部
付日知百川導之東郡國有利病昭然發其蒙平生求友
心擇善得所從如登東魯堂七十爲齊蹤艱貞守薇蕨九
州一飛蓬城南舊寄居釋家檐宇重廡下想遺躅摩挲見
雙松二君實剏議構祠植垣墉陳書會朋舊薦馨申敬恭
紀年述遺事傳志備始終因覩萬生畫衰柳煙濛濛當年
渡江淮藏名隨市傭詩畫互醕贈翩然兩冥鴻分墓各藏
龔仰止心無窮維昔夫子聖三千悉陶鎔六藝式古訓纖
微逮魚蟲盤薄際天人今古爲會通規矩範身心高明守
中庸勉以慥慥志裕爲經綸功舉措謂事業知言能折衝

發之於音聲大樂鳴黃鐘論述開子史倫物胥函容生知
與困學入聖境則同豈稍涉藩籬而遂以自封學者有通
病褊仄自矜崇是已而非人喧競失至公先生坦無私孔
教與折中儒林二百年皎月澄心胸撫畫誦遺詩鄉往夙
所宗學淺拾樸礫追琢慚良工因詩論二君惠言與摩礪
馮桂芬字林一號景亭吳縣人道光庚子一甲二名進

士授編修歷官右中允加四品卿銜有顯志堂稟

詩話景亭私淑亭林學期經世所著校邠廬抗議四十篇坐言可以起行平吳滅賦功在桑梓集中文多有用之言詩雖餘事雅贍而不失格

錢武肅王像爲王裔孫若浩題

唐宋之間五十祀六姓一十四天子一鎮東南屹然峙乃
與五代相終始夾馬營眞人生華山隱者墮驢笑天下從

今始太平翩然卷甲輪歸誠鐵券金甌垂令名天意亡唐
不可挽固知神器難力征又況東南地勢難與西北爭後
來南渡嗟何成謀國豈合學孤注豎儒乃議勤王兵君王
智略濟神武與民休息成樂土莽莽中原紛奕棋烽火漫
天震鼙鼓六橋風月聖湖煙百萬生靈獨安堵憐才一事
更可人足使孤寒皆氣吐司勳罷耗一青衫文綺蒲輪來
幕府錢塘祠宇肅清高靈氣英風照千古時清將種更儒
巾子孫世列清華譜蘭芽瑜珥何聯翩靈運詩篇先述祖
卽今遺像儼鬚眉紙上颯爽來英姿錦裘駿馬好結束想
見江東轉戰時

江陰閻公祠

暨城斗大江之隅縣尉一官尤區區天柱傾頽地維裂孤

埴七尺屹不折王師百萬渡江來降旛徧豎城門開江南
一路傳檄定當車螯臂何愚哉大令棄城走主簿迎馬首
吾所守者國與君無國無君誰與守我公一怒鬚戟張奮
身許國辭慨慷一成一旅尙光復矧茲百雉雄金湯誰知
天心在鼎革早識全軍氣如墨城中雀鼠供饕餮麾下南
雷共心力月輪慘慘挂圍城劍戟薄霜寒逾明烏鵲不鳴
鼓角寂一營唱徹轉五更曲聲淒苦笛迸裂此夕三軍淚
如血西風蕭蕭江水寒飲入我軍亦慘絕一朝城陷公坦
夷噬指自書絕命詞一丈之帛三十字血光寶氣何淋漓
太祖養士長已矣猶有江干一典史人物獨殿十七朝江
山手挽三百里此材乃屈簿尉資有明之亡亦已遲中原
六軍一朝潰誰與主者曰督師新安長平事非偶自甘駢

死古罕有六七萬人無一降萬骨塋高積如阜靈祠恰傍
東平王人稱公是張睢陽我謂公節更有進夷齊庶幾同
輝光聖朝寬大邁前古優詔褒嘉錫祠宇成周穆考亦神
聖不封首陽一坏土

東阿王墓

風雅黃初有正聲雄文八斗冠羣英中原莽莽戈鋌氣東
閣翩翩詩酒情羞與父兄同事業不教賓客掩才名如君
位望猶求試淚灑空山裋褐生

落木

落木竟無邊蕭蕭客館前壯心悲落日鄉思逼殘年寒鵲
喧枯樹霜鴻唳遠天幾莖添白髮攬鏡一淒然

蔡壽祺原名殿濟字霖盦德化人道光庚子進士改庶

吉士授編修有夢綠草堂詩鈔

哀江岷樵中丞

罡風日夜起江濱
摧折東南柱石臣
諸葛有才方樂毅
賀蘭無意救張巡
孤軍竟爾成沙鶴
大節真堪泣鬼神
猶記腐儒曾獻策
早將忠義達楓宸

危城援絕詎能全
百戰餘生一旦捐
投筆漫誇班定遠
裹屍真見馬文淵
丹心耿耿同朝惜
青史煌煌異日傳
不爲枌榆叨庇蔭
臨風也合淚潸然

輓向軍門榮

將星一夜墮江東
耿耿元精返太空
小醜孫恩仍負險
將軍向寵竟無功
縱橫霧氣愁難掃
嗚咽濤聲恨不窮
兩浙三吳失屏障
萬家涕淚灑秋風

粵西橫槊戰功高，吳楚奔馳勝算操。
一代虎威誰繼武，中原蟻賊尙如毛。
興唐裴郭偏無命，扶晉陶溫枉自勞。
帳下貔貅原可用，欲從李祐訪星韜。

周連仲字倬軒，樂亭人。道光庚子進士官禮部主事，有寶稼堂詩鈔。

野望

白日入雲暗，青山近水分。
亂鴉孤塔寺，雜樹老僧墳。
地僻人稀到，泉聲客屢聞。
清虛何處洞，便欲覓苔文。

莊受祺字衛生，陽湖人。道光庚子進士，改庶吉士，授編修，歷官浙江布政使，有楓南山館遺集。

游絲

十丈紅塵踈地來，梧桐庭院鳳凰臺。
已拌歷劫同消歇，豔

說登仙此化胎柳暗花明皆幻夢蘭因絮果任疑猜天邊
舊侶如相問恐落泥塗作棄材

徙倚長空大覺生塵寰消息視陰晴憑他杼軸工難就且
喜丹青染未成不向天孫商去住肯依世網作牽縈珠簾
十二同時啟休冑春光滯遠程

姚近韓字若退號良菴錢塘人道光庚子進士由內閣

中書歷官河南糧儲鹽法道

詩話良菴以中書揀發東河學習游擢道員需次河
南者廿有餘載始授糧道年已八十餘矣秉正嫉邪
屬吏之不自檢者輒而斥之不少假人憚之如神明
而淵雅多文聚書官舍顏其室曰比玉菴尤喜獎掖
寒畯至老不倦

紅橋秋泛

廿四橋頭日暮雲平山秋老荻紛紛看來一樣天邊月不

信揚州有二分

十載重來感舊游
游蹤不分又蘇州
山光還照湖光綠
一聽簫聲可白頭

艾暢字至堂東鄉人道光庚子進士官博羅知縣有至

堂詩鈔

詩話至堂鄉會試皆以第二人獲雋頗有文譽黃樹齋同里友善相與論詩至堂言昔人謂詩不關理天下豈有無理可立言者特比興雜陳微婉多諷所主非一理耳今觀其詩沈鬱頓挫駸駸入古特不免有意欲以理勝亦不可謂非一蔽也

伯牙臺

琴理通萬彙
泠泠含人心
何必鍾子期
始可為知音
絕響久無聞
荒臺留至今
寂寞一登眺
日斜江漢深
天風鼓雲濤
虛籟生空林

夜起

夢回殘酒醒披衣愜幽步簾動裊天風庭虛瀆香露天心
澄夜闌積氣暖空素斜月不到地光淡桂花樹何處得秋
愁寂寞嘯蛩訴

題樹齋給諫所藏雲龍冊子

齋空夜靜星斗明陡覺風雨昏鐙青雷轟電閃起咫尺頽
雲塞地天冥冥恍惚奔趨有百靈海波倒捲枯滄溟怪君
何處得此通神畫令我駭對頃刻迷陰晴我聞龍本至陽
精屈伸變化無定形九天九淵任潛躍出入有雲霧以行
世人不知龍德貴謂可豢養殊不經誰其畫龍卽真龍前
有僧繇後所翁此圖未知出誰手墨香一瀆雲濛濛果有
蜿蜒勢千丈半露雲外藏雲中精靈盡出真宰泣尺幅神

變誰能窮正恐乾坤有時要霖雨忽然帶雲飛去圖爲空
龍兮龍兮我願招之復來入神功既畢此堪蟄老屋空山
伴夜吟雨氣淋漓萬古雲猶溼

野花

拋卻故鄉春遠爲行役人野花紛到眼游子一傷神大地
同風露孤根獨路塵名園多棄壤誰許託栽新

舟中同趙直夫對月

天涯一片月照我宿淮東故國幾時到扁舟今夜同岸高
楊柳露洲遠荻蘆風曠坐對清影浮生念轉空

經古戰場

雲老日無色蕭蕭白草乾古烽黏壁死朽骨泣沙寒大地
何曾隘羣生竟不安紛紛一蠻觸憑弔獨心酸

寄黃樹齋

一別柴關掩玉華情懷寥落亦堪嗟溪風漸冷鶴噤語山
雪欲來梅試花小病屐聲三徑澀閒愁闌影一階斜思君
怕對空潭水照得吟肩瘦倍加

吳世涵字淵若遂昌人道光庚子進士官會澤知縣有
又其次齋詩集

卯山

真人樓閣鬱崔嵬縹緲靈壇絕壁開一室煙霞雞犬去三
更鐙火鬼神來簫聲空渡天邊月劍跡難尋石上苔羽客
不還丹竈冷秋風林下獨徘徊

萬象山

枯城富林麓萬象殊龍嵒芙蓉拔地起突兀高穹揭來

蠟游屐磴道修且崇盤旋出雲表石徑趨靈宮山亭坐一
覽天宇開鴻濛羣峯忽低墮羅列如兒童黃龍與桃隘秀
色千厓通霜風天外來萬木鑽青紅江流日夜去滔滔不
可窮回首望少微曉日光瞳矐矯矯雲中鶴高舉青田東
恨無垂天翼頡頏因晨風憑欄讀趙碣石半蒼苔封淮海
七百載祠宇猶棟隆惜哉不復作勁節遺荒叢山僧善款
客清齋薦葵菘流連未及已暮颺吹寒樓閑情狎野鹿逸
興隨冥鴻詰朝石門去江上飛輕篷

潘會綬初名會鑑字紱庭吳縣人道光庚子舉人官內
閣侍讀贈三品卿銜有咳蘭書屋詩集

阮芸臺曰紱庭諸作皆發抒性靈意存忠厚生長華
闊而不役志於富貴年逾弱冠而能力持平風雅繼
家風之清素結朋簪於
老蒼皆可於此集觀之

詩話續編庭生有至性官內閣以文恭年高久致政遂引疾乞養迨遭親喪服除不復仕後以文勤費就養京邸優游文史宏獎後進布衣蕭然無異寒素老病杜門獨與會稽李越縵相往還光緒癸未元日作書約越縵於三日挈其次子過越縵曰此兒未嘗請人昔歲今茲兩命請君者欲使後生見先輩風流非以科名祿位言也是月謝世歿之前日猶以書貽越縵還日記並所借書越縵為作墓志稱其幼穎悟工詩文及詞晚歲尤嗜詩無一日廢書不觀今年正月方集近歲所作詩手自校閱蓋亦在是時也

桃花塢

金榜才華第一人卜居占得武陵春憐君已被風流誤莫向桃源更問津

滄浪亭

寄跡滄浪亦偶然蘇公名與此亭傳清風明月原無價破費當初四萬錢

神木歌

天外波濤地上起蜀山之精老不死
午日仙人市上眠光氣互虹燭
天紫錯疑駿骨埋土中化成巨脛
如防風誰識燕京修築日丁搬甲
運勞神功古來材大難爲用杜
句五百年來同一夢狂花不肯驚
世人故山子規嘯一春井絡星
精長照樹有時四面生雲霧風雨
聲中忽飛去

十月六日兒子祖蔭試周

古人重試周將以觀所取今日陳
晬盤珍玩列左右一手筆如椽一
手印如斗高堂笑顏開謂可昌厥
後庭前羅眾賓門外賀羊酒爭看
石麒麟光氣滿戶牖我幼號能文
落筆頗不苟侍父來京師謬譽溢
人口屈指今再試依舊青氈守立
身何艱難世業慚自負置兒膝上
嬉持杯慰吾婦吾兒眉眼清聰明
渠自有吾兒頭角高定可卜壽考
傳家

有賜書責之三不朽

題顧丈南雅通政手牘後

淋漓滿幅墨如新
冰雪文章筆有神
報國憂時數行淚
世間何處著斯人

施燕辰原名燕字叔虞號夢玉一號梅巖宛平籍會稽

人道光庚子舉人官內閣中書改江蘇知縣特用道

有紅豆秋居詩藁

詩話夢玉少客鄴州以書生從戎飛書走檄名重一時工倚聲與馬平王定甫通政交相繩檢請遂神一
定甫繼室為夢玉女弟夢玉宰震澤定甫養病官署
茂陵秋雨詞即作於是時定甫詩云病榻羅衾重官
齋蠟炬深損來青鬢影愁入白頭心佳節無
家慣殘年嚮客侵雞鳴有同夢顛倒拂朝簪

竹溪三兄自甘至鄭扶病赴揚賦此送別

談笑究何長
揖別難徐徐雁行
又南北從此填
簾殊憶昔

事親日承顏歡有餘忽忽幾經年各作風塵驅兒女及婚
嫁疾病須匡扶入門向問訊歎息言清臞瞻彼田舍子豈
復離斯須貴者不如賤反爲仕所拘寒月照征程秋風吹
短裾相持一樽酒渺渺何愁予願言各努力弗慮功名虛
富貴我亦易充盈人所虞行成身當退松菊可自娛

青陵臺

青陵臺下美人咽青陵臺上君王悅見妾容顏不見心妾
顏如玉心如鐵無情白練送蛾眉人讀遺歌空淚垂莫向
青陵臺下過女貞樹黑杜鵑悲

史夢蘭字香厓樂亭人道光庚子舉人官朝城知縣加
四品卿銜有爾爾書屋詩草

詩話香厓織東耆舊著書等身綱羅文獻輯四朝諫
史永平詩存皆鉅編也會文正督畿輔招至保陽諮

民間利病文正去位卽還里不復出詩冲和樸厚無
輕佻雋殺之音詠史諸作如李陵云龍門外已無知
已麟閣中猶有故人李泌云從來君相難言命如
此神仙好讀書可謂警句又有全史宮詞二十卷

水塔寺

驅車出郭門緇塵迎面撲引領見西山頓覺豁心目金碧
煥樓臺清華足水木蘭若遠相望煙嵐圍簇簇言尋相國
園水塔名久熟取徑御園西岡巒爭起伏詰曲度龍潭一
徑入松竹池榭雖荒涼邱壑尙迴複架石以爲梁牽藤可
補屋繞砌亂泉鳴依簷飛鳥宿雲來萬樹平雨過千峰沐
奇石蹲虎龍幽林狎麋鹿仙果間名葩朝暮散清馥平居
愛名勝如渴思茗粥今晨來此間如畫得飽讀無奈世網
牽欲留不可復回首謝山靈何時此卜築

由水巖過大峪登紫石厓

纔下東峰巔又上西山頂人或笑其勞吾自厲吾猛細路
循巖磔登頓披榛梗鳥鳴林壑幽犬吠林塢靜過澗時低
頭攀崖還引領流泉足底鳴激石聲作屢曲磴盤環環平
梁橫挺挺行行且復休小坐據高嶺南望海天闊晴空開
萬頃城郭帶斜陽白沙接溟濤四山紅葉紅更比春光靚
傍晚尋路歸十步九換景童冠共陶然歌吟忘路永到寺
日已沈夜游還燭秉寓內多名山焉能徧游騁人苦不得
閒蓬萊在人境

登永平城樓

風雨孤城暮危樓接太清亂山肥子國野水漢家營飛鳥
衝煙出長虹壓浦明古來征戰地憑弔不勝情

過高經略橫灤別墅故址

地已歸禪寂猶存別墅名殘僧迷舊事老樹變秋聲水落
山根豁雲開岸脚明謝公墩自在一任後人爭

重游九蓮庵

錦繡屏風四面開騎驢又逐白雲來夕陽峯影當窗落細
雨泉聲繞壁迴僧指瀑源穿樹杪雀爭殘果墜經臺青山
如舊朱顏改醉向林巒醉一杯

常職卿以自遣詩見示因廣其意答之

北海之濱舊結廬東園松竹未應疏雲山壁上無聲畫風
雨鐙前有味書懶向雞蟲爭得失時將烏兔驗盈虛家居
自爲鱸魚戀豈待秋風賦遂初

漫向胸中設町畦早知身外盡筌蹄事當棘手機須靜物
到平心理自齊院僻荒苔隨意綠林深幽鳥盡情嘯蕭齋

戲補王褒約煮茗熏鑪課小奚

汪士鐸字振庵號梅村江甯人道光庚子舉人賜國子

監助教銜有悔翁詩鈔

詩話梅村覃精樸學著述數十萬言遇亂半燬棄今
行世者桑經班志各有專書又爲南北史補志皆精
洽翔實卓然可傳詩樸屬微至擇言尤雅良由經
映史覆根抵既深所謂學人之詩其所蘊者厚也

楊四留宿

春山三兩家新筍已成竹門前老佃夫縛竹編茅屋虛堂
移匡牀中廚饋齋粥自云田家貧伏蜡治食肉繞宅多樹
杉廢圃偶蓺菊時艱需將才檠戟徧宗族自愧筋力衰映
畝伴黃犢三河覆全師又爲塞翁福去年風雨和儲米七
十斛鹽豉幸知釀差不負吾腹語久月出斗拂草止予宿
瓦瓶留榻前椒薑點茶熟

丁卯冬日作

萬類分歧途心爲不羈馬銜勒一以緩頰轡若襄野塞筭
杜其幾蔽明義已下見好思則遷艱輒不可把素衣倏染
緇康莊終焉舍哲人慄朽索養之以欲寡顧其馳驚念猶
同金在治朱君養儒防銜振御以風與雅科斗辨周鼎雷回
羅商巽嶧山秋訪碑漳臺春尋瓦竹窗鑪熏清摩抄日陶
寫世無九方歎誰學古人者茲譬鳴和鸞協采齊肆夏昔
爲江漢游悔未結汐社徒合望晴川思君如白也

延熹甄

火井欲燼當延熹腐鼠竊國魁柄移五侯老謀一夕定屠
若羊豕無逶迤豈伊紉權位將軍跋扈猶當時豈帝果英
武孝桓闇弱中人姿始知大勇在能斷需者事賊無遲遲

願銘甄官置座右時若發機慎爾爲

建德縣東陽橋古木

古木壽者數百年柯條凋盡霜皮斑
昂首塵外不可屈俯視萬樹柔且孱
風饕雪虐兀不動併葉蘂蘚皆從刪
懶闕陵谷斂精采剩有靈氣宵往還
明堂太廟卜隆棟訐謨袞冕趨清班
或爲蒙童涉江海載茲壯士康時艱
倅輪弗作匠石逝良材衰朽儕茅菅
暫停征轡一流盼野僧掃紛開松關
煙蘿風篠媚空翠猗儻無知宜朱顏
飽飯滅燭供小憩夢見社櫟驚我頑
謂大神力辟世法資持舊律非南山
澗阿雲水足受用子所頌禱同謗
訕質明再拜謝不敏輪囷千尺難
躋攀擔簦陟嶺遠千里望君猶立空
山間

蟋蟀

出世迫秋色感時多苦音戶庭今夜冷刀尺故園心誰是
授餐者因之戒鬪深呼鐙方覓汝露草莫微吟

在平

驟車歷鹿碾沙平小憩征塵雨乍晴滿院弦歌喧晚驛一
隄楊柳抱春城河干地控碣礪成隴上人耕鼓角聲亦有
賓王在徒步何常不見涕縱橫

輓林文忠

海上歸來宦橐空負戈萬里復從戎玉關田賦三司外金
齒功名百戰中畢竟蒼生思謝傅果然天子用溫公大星
一墜英雄恨五管烽煙照嶺紅

板橋

青淮交匯板橋頭風景高梁局未收天半樓臺開夕市夜

深簫鼓過中流繁華返復兩黃鵠人事漂零一白鷗莫怪
杜陵遙痛哭千門蕭瑟曲江秋

續溪北鄉石鶴山劉宋安成太守陳猛墓

陳武帝之
會祖也

林莽蒼茫石鶴幽土花遙憶六朝秋貽謀幸值梁承聖世
系追書漢太邱想像生金尋墓碣幾會刻玉護松楸萬安
陵寢經行處一例荒涼牧豎游

偶成

藍縷牛衣亦可人莫孤石火百年身緣無駿馬方求骨豈
有靈犀不辟塵博望仙槎通斗極公孫高閣逼星辰龍門
壺口尋常路齒冷人間最要津

陶翁之獨立圖

簡練揣摩君酒德緣循困畏我茶經鼃鼃莫莫城南路俱

是江東處士星

陳松泉司馬畫冊

舊傳指下十三聲銀甲當樓按拍明聽到換頭哀豔處寒
蟹疎雨豆花棚

劉曰萼字韻泉鹽山人道光庚子舉人官武強訓導殉
難有篋山詩草

秋日館中述懷

秋樹人家水郭煙高原樂事自年年一鐙夢雨初聞葉八
月飛花正采棉禦歲那拋新白紵謀生只辦舊青氈早知
蘇季誇金印不換城南二頃田

步西院作

客意如春倦西堂暫此經風閒花上帽人靜鳥趨庭水色

穿簾白棠陰出院青題詩問窗竹記否一年聽

河西務早發

落落晨星大荒荒海氣蒸戍樓咽霜柝水驛閃風鐙夷騎
往來熟塵沙感慨增劫灰何代寺我欲問胡僧

昆明湖雜詠

石甕山前日又曛繡漪橋下水泔泔金遼往蹟殘碑少誰
問湖邊耶律墳

毛貴銘原名文翰又名慶鴻字彥翔號西園亦號西垣
巴陵人道光庚子舉人大挑教諭有西垣詩鈔

荒郊

我行經荒郊荒郊不忍視暗林疑履聲陰風颯然起干塋
卧荆榛犁痕尺以咫想其奔苦時愴惻念孫子安知非英

雄臨絕心未死茫茫大地間百歲僅彈指勿論彭與殤賢
達盡如此

同鄭硯溪北岡小眺歸途遇雨

暮鴉將雨色一并落平蕪歸近還餘興寒生只半途山隨
雲起斷天共樹低無今夜齋頭卧蕭蕭聽轉孤

還鄉河

宋徽宗北狩過此有還鄉之歎故名在今豐潤城外

汴水河頭王氣窮還鄉遺恨亦成空千年花石留殘魄一
笛牛羊歸晚風纔解望天悲薊北可能揮淚憶陳東家山
念盡南冠客五國城中斷塞鴻

月夜池上獨酌

小船漾漾受風微疏竹泠泠墜露稀人影倒池魚駭逝月
光穿樹鳥翮飛異鄉秋老頻中酒永夜寒深數換衣已忍

日知錄言田卷一 一五四十三
三
伶俜強高興年來祇道不思歸

曹翰田字耕之銅陵人道光庚子舉人有寄園詩鈔

碎石嶺

石磴何盤紆煙蘿相映護仰陟雙峯凹俯窺一綫路泉聲
鳴幽澗鳥道出高樹隔嶺有數村疑向桃源住

漫詠

小圃不半畝草樹交蒙蘢荷鋤理荒穢亦加斤斧功稍稍
見條理蘭菊成芳叢就中有特立翠柏柯如銅其旁接密
蔭藹藹青梧桐梧桐易搖落柏勁凌寒冬

薩大文字燕坡侯官人道光庚子舉人有荔影堂詩鈔

東郊

偶步東郊外纔知春色深鶯花撩倦眼山水靜人心荷篠

者誰子長歌入晚林逝將屏城市住此任登臨

張煒字藜青號星南又號西崖靜甯人道光庚子舉人

有三香散人遺集

兵車行

櫛亂也

挽角弓飛羽箭鼓奔雷馬走電陣雲滾滾吼長鯨旌旂直
上捲天半風雨嘯嘯鬼神愁星斗昏黑天地慘龍爭虎鬪
無休歇吁嗟元黃何時判憶昔秦中全盛時守臣廉明民
生莫執法不容吏貪墨朝野昇平慶清晏人人盡道曾聞
羅會不去時陝不變會在全省賴肅清會去渭陽回子叛
一夕烽火連天起國家從此多征戰前有長髮後逆回陝
西未平甘肅亂朝廷大開招募局詔令處處整團練詎知
民氣久凋殘望風披靡皆奔竄回子未來事戎行回子來

時團練散老填溝壑壯者走父母妻子不相見十邑九村
無煙火長安道上行人斷自從大眾西行日少者數千多
逾萬先苦賊寇後苦兵征役不息饑饉薦日捐月捐已不
堪飛捐黑捐尤可歎鶉觚斗粟八千錢金城米價三十貫
人飢食人馬食馬雞犬無聲蓬蒿徧昨夜羽書到金城虜
騎已過玉門縣內地寇氛尙如此何況敵國與外患朝廷
賴有恪靖伯重整山河復禹甸招降納附集流亡閭閻始
得免兵燹戎狄豺狼胡可玩嗚呼戎狄豺狼胡可玩

郭柏蒼字兼秋侯官人道光庚子舉人有補蕉山館鄂

跗草堂三峯草廬沁泉山館諸集

詩話兼秋爲遠堂制軍介弟兄弟五人皆登甲乙科
子姪及孫行後先繼美門材極盛詩以平遠擅勝

甌甯許秀才賡皞修武夷山志墜巖死

九曲峯頭路吟魂日夜過死奇會是天詩好不須多穀雨
茶誰寄名山志永訛年年江水滿愁絕憶巖阿

天柱峯

紅紅綠綠九曲樹蒼蒼茫茫半江雲攜書來向天邊讀不
許人間一字聞

偶氏良峯草堂雨夜

獨坐方知風竹勞穩眠始信草堂高雨過螢火徐徐出壁
冷蛩聲漸漸豪涉世無愁惟小草讀書有味是殘膏龜魚
莫豔滄江闊池水明朝長半篙

晚晴移詩匯卷一百四十三終